

## **Mattup ere ki poone Pool yi riiŋe a doŋ a Tessaloni**

*Enj urzi k'ono doŋ kun t'oone adda mattup  
ettiyo*

Ette mattup ere ki poone Pool yi riiŋe a doŋ i ziipe addaŋ a Isa a geeger Tessaloni. Tessaloni tod'te geeger ki siido Girek, a biza bar ki Mediterane. Pool geŋ ti lanjayí Silas ti poone an iide ki Tessaloni me, an an di gizite Rabila Majjaanawa k'Isa Almasi. Doŋ baadaŋ a Tessaloni geŋ an d'umbe urzi k'Almasi. Wo de k'ita maŋ doŋ miibi ti diine Yawudiyagi an iide'ŋ an an t'eelite ono a kane doŋ Tessaloni, kono an di-tooge k'ollige k'ono Pool ti Silas me. (Naabo doŋ zina 17.1-10)

San maŋ Pool y'a igibe Timote y'a ti'n wollo zemba ki Tessaloni geŋ, lekkiyadaŋ mummino koo maŋ? Aame Timote y'iide wo yi-gime maŋ, yi di t'iide taaya a Pool y'ede, an seedu daayum zakidi a urzi k'Isa me, wo de doŋ ongoŋ ti diinayaŋ an di-toogiyo ki naabo k'ombo bizaŋ me. Wo kane an'de, kama k'Isa goppon an niiba maŋ, a t'isa ki bita. Wo doŋ ongoŋ eedaŋ a digge kono maawaŋ ti lanziyagaŋ baadaŋ an t'inda, wo Isa yi ki kama ye botto. Kono kamo Pool y'an di riiŋe mattup kono an t'eele toogo, wo y'an di ruute soŋ mummino me kama k'Almasi t'isa me.

### *Toose ki Pool*

<sup>1</sup> Mattup ette i raaniya nunj Pool ti Silas wo Timote, a kune donj ogiyso ti suma k'Isa a geeger Tessaloni, kune donj ki Meega Raa wo ki Galmeega Isa Almasi. Geŋ beeko ti toose ki Raa i koonaa eggun.

### *Lekkiyo wo zaapu k'adde a Isa ki donj Tessaloni*

<sup>2</sup> Adda tonɗiyo Raa ere kaye ay tonɗiyo gette, daayum ay rootiyo koduwo a Raa kono kune pay wo sundugun ay gi-di seɗɗiyo ye. <sup>3</sup> Adda tonɗiyadey a daana Meegin Raa gette, kaye'ŋ ay elkiyo daayum a kune, a naabagun ere a urzi zaapu k'addugun a Isa, a lekkiyagun ere kun geɗɗiyo Raa t'adde soo, wo a zaapu k'elkisagun a Galmeegin Isa Almasi ere kun seɗɗu zakidi bini danj. <sup>4</sup> Zamba ki nunj, kaye ay suune Raa y'unni giyye, y'unni biire kun t'ize donj ki yode. <sup>5</sup> Munda geŋ ay yi suune kono Rabila Majjaanawa k'Isa ere ay un gizite gette, tod' t'iina di kune t'urzi k'ono donj uɗɗe ti bizey danjal ye, wo soŋ ti toogo ti noogiyo k'Unde Kamilen, wo ay zuune adda k'addey ono donj ay gizite geŋ kane d'erec. Injino kun suune lekkiyo ere kaye ay likke a diine kune gette, tod'te un d'ize beehiye a kune. <sup>6</sup> Kune kun t'ize donj umbe zina kaye wo ki Galmeega. Adda dabar baadan tonj ono Raa kun di'n ziida t'unɗuwo ere ettiyo t'urzi k'Unde Kamilen\*. <sup>7</sup> Injino manj kune lekkiyagun ti konso aa urzi a kane donj pay i ziipe addan a Isa a siido Maseduwan ti Akayi

---

\* **1:6** 1.6 Kun wollo adda mattup ki Naabo donj zina 17.4-9.

geŋ, an di wolle an d'ozire eego. <sup>8</sup> Ono Galmeega geŋ ti di kune i-tiipe adda siido Maseduwan ti Akayi danŋal ye, wo soŋ rabila ere a urzi zaapu k'addugun a Raa gette i-tiipe a ume tuuku ton maŋ, inŋino i ki dehu ay ki roote munda ye baa a urzi zaapu k'addugun me. <sup>9</sup> Duwo pay an tôwwo taaya a tukki kaye an'de, mummino a ettiyadey ere di kune gette kun ayni ziida me, wo mummino kun di-gime ki tukki Raa me. Urzi longayi kun d'iili, kun di daaniya Raa ki kotto zeere kono kun i di naabe, <sup>10</sup> wo kun di delle Ulí Isa y'a kimo ti kandaane. Yo Ulo geŋ Raa y'a ti y' bilde ti diine don unto, wo yon y'in di'n utta ti booro Raa ere aana.

## 2

### *Naabo ki Pool a geeger Tessaloni*

<sup>1</sup> Zemba ki nuŋ, kune batum kun suune beehiye ettiyadey di kune gette ki bita ye. <sup>2</sup> Soŋ kun suune ki poone ay d'aaney di kune geŋ, adda geeger ki Pilip gette an ay di'n dibire wo an ay di'n gildite. Wo de saŋ Raa y'ay d'eele toogo ay un di gizite daa k'orgiso urzi Rabila Majjaanawa adda dabar ere baadan gettiyo ton maŋ\*. <sup>3</sup> Rabila Majjaanawa ere ay kazita a duwo ette, tod'te ita k'ono don butte ye, elkisadey oldo ye, wo ay ki dehu duwo ay gi di'n mabilde ti metinŋo ye. <sup>4</sup> Wo de ki kotto maŋ, kaye Raa y'ay ti'n niime, y'ay di'n wulle don aane i-t'ise naabadí, maŋ y'ay d'ele a beezey naabo ay di kizite Rabila Majjaanawa. Ankenŋ ono don

---

\* **2:2** 2.2 Kun wollo adda mattup ki Naabo don zina 16.19-24; 17.1-9.

ay kazita eɲ, ay k'okkime onamey kono ɗuwo ulbaɲ an ki d'ise unse ɗo ye, wo ɗe ay kazita kono ulbe i-d'ise unse a Raa, yode wede i suune ono k'addey. <sup>5</sup> Geɲ inkiɲo kun suune beehiye, piɗipiɗiɲ kaye ono ɗoɲ ki mabilisa ɗuwo ulbaɲ an d'ise unse ay ki gizite ye, piɗipiɗiɲ t'urzi k'onamey ay ki dihe ye ay t'oone munda ti beyguɲ me, ono ɗoɲ ay rootiyo eɲ Raa toɲ yi wolliyɲo wo y'ollige. <sup>6</sup> Kaye ay ize inkiɲo kono ay ki dehu wenda y'ay gi di'n t'imme ye, ise kune, ise wede doolo toɲ maɲ. <sup>7</sup> Ki too maɲ kaye ɗoɲ zina k'Almasi geɲ, ay d'ede urzi ay un di'n dokke ki toogo. Wo ɗe kaye a diinaguɲ geɲ, ay ti t'isse tuddey poyoyo aakede erewo ti boohiyo inɲitú a gulbatú. <sup>8</sup> Kaye ay unni giyye baadaɲ geɲ, ay di dihe ay un kizite Rabila Majjaanawa ki Raa ɗaɲɲal ye, wo ɗe ise k'unto toɲ ay di-t'inda kono kune me. Derec, geyyisadey a tukki kune gette baadaɲ a jiiire! <sup>9</sup> Zemba ki nuɲ, kun suune naabo ere ay y'iidi yeebadey did'ɗo onɲu ay d'urme gette, kono ay ki dehu a wenda soo toɲ ti diinaguɲ ay yi-ki t'ele attidí ye, wo geɲ inkiɲo ay un gizite Rabila Majjaanawa ki Raa te.

<sup>10</sup> Kune kun wulle wo Raa toɲ yi wulle, sooruzey a ɗaana kune ɗoɲ i ziipe adduguɲ a Isa gette tod'te kamileɲ, ki diine wo wenda yi k'ambe sundey k'ulsuko ye. <sup>11</sup> Wo kun suune, aame kaye a diinaguɲ geɲ, ay likke ti wede tuuku toɲ aa lekkiyo meege t'inɲizi. <sup>12</sup> Kaye ay un d'eele kooke, kun d'uune toogo wo ay di gid'ɗima ay un ti'n ziipe urzi kono kun di lekke lekkiyo ere aa Raa yi dehu, yoɲ y'unni waaku kun di lekkey adda daryika ki Mozikadí.

13 Kaye daayum ay roote kofuwo a Raa ki munda soo sey: Aame ay un gizite ono Raa geŋ, kun d'illiga wo kun d'umbe, kun k'ilke ye eŋ ono d'oŋ tudde me, wo de kun ilke'ŋ kane ono Raa derec. Kane ono geŋ an di naabiya adda k'adde kune d'oŋ i ziipe addugun a Isa. 14 Geŋ zemba ki nun, kune kun diine ita d'oŋ ki Raa ogiysito ti suma k'Isa a siido Ziide, kane an lekkiyo kettiyo kaŋ soo t'Isa Almasi. Kune'ŋ d'oŋ siidagun batum an un di'n dibire, aakede Yawudiyagi an dibire d'oŋ ki Raa ogiysito ti suma k'Isa a siido Ziide†. 15 Kane Yawudiyagi geŋno batum iide Galmeega Isa ti nebiyagi me, wo kaye toŋ an ay di'n dibire‡. Raa geŋ ulbi i-k'isiyo unse ye ti kane me, kane adu ki duwo pay. 16 Kane an ay t'eegirso ay di kizite a kane d'oŋ Yawudiyagi ye ono d'oŋ an t'oone uttiyo me. An isiyo inkiŋo geŋ, an a-ti kummiyo oldikadan ekk'oldiko maawan ere daayum an ize, wo de kane geŋ an a-ti diŋge ti kulkuwo Raa a eedan§.

*Pool yi dehu y'a kime ki Tessaloni*

17 Zemba ki nun, ankeŋ kaye ay ti lidfo ti tuddugun k'onniyto miibi, derec ki tudde kine dokki wo biza k'ulbiŋ kaŋ soo. Kaye ay d'ede mosogo baadan ki kune, ay dehutu urzi ay d'ette ay un ti'n wollo sey. 18 Kono kamo ay dehu

† **2:14** 2.14 Kun wollo adda mattup ki Naabo d'oŋ zina 17.5-6.

‡ **2:15** 2.15 Kun wollo adda mattup ki Naabo d'oŋ zina 9.23,29; 13.45,50; 14.2,5,19; 17.5,13; 18.12.

§ **2:16** 2.16 Kulkuwo Raa a eedan: Kun wollo adda mattup ki Romenŋ 11.1-12, ume wede Pool yi rootiyo yi zuune adda k'addi zembadi Yawudiyagi geŋ Raa y'an utta.

ay di kime di kune, wo nuŋ Pool eŋ n'a dihe taŋ baadaŋ n'a ette, wo de Meeda siitandani t'ay t'iigire. <sup>19</sup> A kama ki Galmeegiŋ Isa Almasi geŋ, ki kotto zaapu k'elkisadey, uŋsuwadey wo kadumul ay kiley tuddey tiŋ kune a dfaanadi me. <sup>20</sup> Eyye, t'urzi kune ay t'oona tamma, wo ulbey aasa uŋse.

### 3

#### *Agisa Timote ki Tessaloni*

<sup>1</sup> Kaye ay ki d'iine ombiŋe ye daa k'ollige rabilaguŋ me. Inkiŋo maŋ ay d'ilke, beehiye ay di lekke siidey a geeger k'Aten\* te. <sup>2</sup> Wo kaye ay un d'igibe leemadey Timote, yoŋ wede yi naabiya ki Raa ti kaye kaŋ soo a urzi kazita Rabila Majjaanawa k'Almasi. Ay un y'igibe kono y'un t'eeley kooke wo kun t'ooney toogo a urzi zaapu k'adduguŋ a Isa me. <sup>3</sup> Inkiŋo maŋ ti diinaguŋ wenda soo toŋ yi t'ooro ye ti dabar ere aŋkenŋo ette, kono kune batum kun suune beehiye, dabar gette a-t'ette a munda wede Raa yi dehu y'aase a tukki kine. <sup>4</sup> Aame kaye di kune geŋ ay un di ruute ki poone, ay'de: «Kine in t'oona dabar baadaŋ.» Wo geŋ inkiŋo kun suune, dabar gette t'a iina. <sup>5</sup> Kono kamo ni k'iine ombiŋe ye n'a delle me, inkiŋo n'a t'igibe Timote y'a seddo mekk'ono a urzi zaapu k'adduguŋ a Isa. N'ize inkiŋo n'orgiso, koo Meeda siitandani t'unni naamey daggiya koo maŋ, geŋ oodibe yeebadey a urzi kazita k'ono Raa di kune gette a ki t'ise ki bita ye.

---

\* **3:1** 3.1 Kun wollo adda mattup ki Naabo d'oj zina 17.15-16.

### *Kooke a nuuge don Tessaloni*

<sup>6</sup> Wo de anken Timote ti di kune yi-gimot†, y'ay d'iido ti rabila majjaanawa a urzi zaapu k'addugun a Isa ti geyyiso ere un d'ede a diinagun te. Yon y'ay ruute kune ton kun elkiyo daayum a kaye me, kun dehu kun ay ti'n wolle sey aa kaye ton ay dehu ay un ti'n wolle kay. <sup>7</sup> Inkinon man zamba ki nun, adda k'ulbe k'oodiyo baadan ti dabar ere a eedey gette, kaye ay d'uune toogo t'urzi zaapu k'addugun a Isa gen me. <sup>8</sup> Wo anken kaye ton addey i t'udige, kono kun seedu zakidi a urzi lekkiyo kettiyo kan soo ti Galmeega me. <sup>9</sup> Kune a daana Raa addey kun ay ti'n uune t'unusuwo, wo kono kune gen ay di roote koduwo a Raa kan mummino ton ay ki suune ye. <sup>10</sup> Didfo, onnu ay kodfime ton diyo Raa kono y'ay di t'ihina urzi ay d'ette ay un ti'n wollo sey, wo munda wede a biite a urzi zaapu k'addugun a Isa gen ay un ti y' dangey.

<sup>11</sup> Inkinon kaye ay ton diyo Meegin Raa batum ti Galmeegin Isa, an ay di-t'ihina urzi wede ay d'etta di kune. <sup>12</sup> Wo son geyyiso ere un d'ede ti tuddugun wo ki don pay gette, Galmeega y'un t'aagal k'aagulu, tod'te aakede geyyiso ere kaye batum ay d'ede a tukki kune. <sup>13</sup> Gen Galmeega y'un elo toogo a biza k'ulbugun, inkinon a onniyo ere Galmeegin Isa y'aana ti donzi pay gette, kune a daana Meegin Raa ooyiso kese a yode, wenda y'a ki roota k'ulsuko a tukki kune ye baa.

---

† **3:6** 3.6 Kun wollo adda mattup ki Naabo don zina 18.5: Pool yi riine mattup ette aame yon a geeger ki Korent.

## 4

*Lekkiyo ere aa Raa yi dehu*

<sup>1</sup> Injino ki d'angu zamba ki nuŋ, kune'ŋ an unni duuye mummino kun di lekke a urzi wede Raa ulbí i-d'ise unse me, wo d'erec kun sooru miŋ a urzutú. Wo de ankenno ay un obe bey wo ay un d'eelo kooke a munda wede kun d'ise ti suma Galmeega Isa, geŋ lekkiyagun gette un d'odo t'injino. <sup>2</sup> Kune kun'ni suune ono don ay un ruute, kane geŋ Galmeega Isa y'a ruute.

<sup>3</sup> Enno munda wede Raa yi dehu me: Kun lekko don ooyiso kese a Raa, kun ooli tuddugun a urzi boliyo ye. <sup>4</sup> Wede tuuku ton ti diinagun yi suuno seefu tuddi\*, y'a lekko ooyiso kese a Raa wo duwo an i di t'ele suma. <sup>5</sup> Y'a k'ooli tuddi ki naapu a suldi don ulpi tudde ti dehu genno ye, aakede don i ki suune Raa soo danjal ye ge d'isiyo. <sup>6</sup> A urzi suldi geŋ, wede tuuku ton yi isa ulsu a lemadí ye wo yi ti y' mabilda yi deha eddi ye, ise erewo ton injino. A wede y'isiyo injino geŋ i-ti dooza Galmeega ti siidi, ono en ay un ti'n ruute wo ay un ti'n doolo sey. <sup>7</sup> Kine Raa y'inni wiike in gi di lekke a urzi pitinjo dehu tudde ye, wo de y'inni wiike in di lekke don ooyiso kese a yode. <sup>8</sup> Kono kamo, wede y'a ti doopide a suldi don ay un ruute kun d'ise genno man, yi

---

\* **4:4** 4.4 Tuddi: Ono don i rootiyo «tuddi» geŋ, t'ono Girek «umpo». Ono don Pool yi ruute «umpo» geŋ, don ongon an elkiyo i-kaza «tudde», wo don son an elkiyo i-kaza «erewo». Injino man kane don elkiyo «erowo» geŋ an di riije, an'de: «Wede tuuku ton ti diinagun yi suuno beeriyo k'erewo, an di lekko ooyiso kese a Raa geŋ duwo an an t'ele suma.»



koogire wedusu ye, yi koogire Raa wede un ele Unde Kamilen.

<sup>9</sup> A urzi geyyiso tudde aakede zamba gen, i k'ise ye baa ay un di raane sey me, kono kune batum Raa y'un ti'n duuye a urzi geyyiso tuddugun me. <sup>10</sup> Geyyiso tin, tod'te ere un d'ede a tukki zamba don pay i ziipe addan a Isa a siido Maseduwan pay gettiyo. Wo de zamba ki nun, kaye ay un t'ele kooke ay t'eese un d'odo t'inkino. <sup>11</sup> Kun deho lekkiyo ere ti toose ti duwo, kun wollo naabagun, wo k'ombagun kun naabo ti beygun, gen kun iso aakede ay un ruute kun d'ise. <sup>12</sup> Kun iza inkino man, lekkiyagun t'a koonaa beehiye a daana don i ki ziipe addan a Isa ye me, wo kune ton kun ki tonda munda ti bey wenda ye.

### *Baldiya ki don i t'inda*

<sup>13</sup> Zamba ki nun, ay dehu ay un di roote a urzi don i t'inda, kono kun ki-t'ise sommagi dondon ye, aakede don i ki zaapu elkisadan a Isa ye.

<sup>14</sup> Derec, kine in umbe Isa y'inda wo yi bilde ti diine don unto. Gen inkino kay kane don i ziipe addan a Isa wo an t'inda gen, Raa y'a ti'n balda wo y'a ti'n t'okkiya kan soo t'Isa a sirpadi.

<sup>15</sup> Kun ollo, ay un rootiyo en ono Galmeega yi ruute: Onniyo ere Galmeega yi kimo gette, kine don i ziipe addan a Isa i lekkiyo zeere botto gen, in k'ooguma ye ki daana kane don i ziipe addan a Isa i t'inda me. <sup>16</sup> Aame gen duwo an d'olliga d'olle, tod'te golla ki goole maaleekiyagi yi baahu parre Raa. Inkino yode Galmeega Isa batum y'a deego ti kandaane. Wo kane don i ziipe addan

a Almasi wo i t'inda geɗ, an di-balɗa ki poone. <sup>17</sup> Saɗ maɗ, kine ɗoɗ i lekkiyo zeere botto geɗ, in d'engila k'awwa ti kane kaɗ soo ekki dondari, k'okkime Galmeega a kandaane. Geɗ inɗkino, in di lekkey ti Galmeega ki daayum. <sup>18</sup> Inɗkino maɗ kun elo kooke ti tuddugun t'urzi dooyiso ette.

## 5

### *Onniyo kama Galmeega*

<sup>1</sup> Zemba ki nuɗ, i k'ise ye ay un di raaje a urzi k'onniyo, ise a urzi peedo ere sulɗi pay geɗ an d'aana me. <sup>2</sup> Kune batum kun suune adda k'addugun: Onniyo ere ki Galmeega y'a kimo gette, t'aana aa wede k'oogire y'ettiyo a didɗo, wenda soo toɗ umbo a suuna me. <sup>3</sup> Aame ɗuwo an iisa rootiso: «Anɗkenno kine adda toose, munda k'orgiso umbo baa» maɗ, inɗkino a kaamiki geɗ miɗ dabar baadan t'a deega eedan. Geɗ dabar gette t'aana a kaamiki, aakede kakkisa k'ere wo addutu i t'umbe k'ehiyo, wenda soo toɗ umbo a t'alɗa me. <sup>4</sup> Wo de zemba ki nuɗ, kune adda zimolo ye kono onniyo gette t'un di'n kiira sutte aa wede k'oogire me. <sup>5</sup> Kune ɗoɗ ki toore Raa, lekkiyagun aa a onnu. Kine ki didɗo ye, ki zimolo ye. <sup>6</sup> Inɗkino maɗ in t'udige ye aa kane ɗoɗ ongo me, wo de in lekko zeere, tuddiɗ in ti soodo. <sup>7</sup> Kane ɗoɗ i moone geɗ an moone a didɗo, wo ɗoɗ i sobo toote i ceeriyo eedan geɗ an sobo a didɗo\*. <sup>8</sup> Wo de

---

\* **5:7** 5.7 An sobo a didɗo: Ti kaaga geɗ a siido Gires kane ɗoɗ Yawudiyagi ye an sobo toote a didɗo, wo di kine inɗkino ye, ɗoɗ an sobo a onnu wo a didɗo pay.

kine don lekkiyadin aa a onnu gen, tuddin in ti soodo. In lekko a urzi zaapu k'addin a Isa wo ti geyyiso tuddin, kane gen a kine aakede asigursu yi t'usse saapa. Wo in zaapo elkisadin a Raa wede yi'n utte kono zaapu k'elkiso gette, tod'te aakede asigursu yi t'usse kakkile maala.

<sup>9</sup> Kine Raa yi dihe y'inni wiike toc min y'a ki dekka booro eedin ye, wo de y'inni wiike kono in t'ooney uttiyo t'urzi Galmeegin Isa Almasi. <sup>10</sup> Isa y'inda kono kine, inkino a kamadi gette ise kine in lekkiyo zeere, ise in t'inda ton man, in lekkiyo kettiyo kan soo ti yode. <sup>11</sup> Inkino man kun elo kooke wo kun noogo tuddugun kono kun di t'hira a urzi zaapu k'addugun a Isa, wo ni suune naabo gette kun isiyo too.

### *Toose ti kooke wede ki dangu*

<sup>12</sup> Zamba ki nun, ay un di roote'n, kun an ottilo a don oofibe yeebadan a naabo ere a diinagan, kane don Galmeega y'an ele urzi an un di'n dokkiyo wo an un di'n aapudu gen me. <sup>13</sup> Kono naabo ere an isiyo a kune gette, kun an ottilo baadan wo kun'ni geeyo. Kun lekko ti toose ti tuddugun.

<sup>14</sup> Zamba ki nun, ay un t'eele kooke, ay t'ese'n: Don golguwo kun aapan, don an d'ede orgiso addan kun an eelo kooke, kun noogo don weedayan umbo wo kun lekko t'ombine ti duwo pay. <sup>15</sup> Kun koono mentikagi, wenda soo ton a bakadi yi-kima ulsuko t'ulsuko ye, wo kun deho daayum isiyo beehiyko ti tuddugun wo ti duwo pay.

<sup>16</sup> Kun lekko daayum t'unṣuwo, <sup>17</sup> kun tondo Raa daa puukiyo, <sup>18</sup> aame ize munda tuuku toṅ maṅ, kun rooto koduwo a Raa. Geṅṅo suldi doṅ Raa yi dehu kun d'ise a urzi lekkiyaḡuṅ ere kettiyo kaṅ soo t'Isa Almasi te.

<sup>19</sup> Kun i t'eegire ye a naabo k'Unde Kamilen te. <sup>20</sup> Kun'ni kiigira ye ono doṅ Raa y'agisa zemba an un di rootiyo geṅ me, <sup>21</sup> wo de ono geṅ kun ti'n wollo pay: Doṅ beehiye kun di zaapo adduḡuṅ, <sup>22</sup> wo kun ti ledfo t'ita suldi doṅ ulpi tuuku toṅ maṅ.

<sup>23</sup> Geṅ Raa wede i d'eliyo toose geṅ, yode batum y'un ti'n iso doṅ ooyiso kese a yode a urzi lekkiyaḡuṅ ere pay gette, y'unni booho pay, yi booho tudduḡuṅ, unduḡuṅ, wo biza k'ulbuguṅ. Injino maṅ a onniyo ere Galmeegiṅ Isa Almasi yi kimo gette, wenda y'a ki roota k'ulsuko a tukki kune ye baa. <sup>24</sup> Raa wede unni waaku geṅ, yoṅ yi seedu zakidi a munda wede yi rootiyo y'aasa me, geṅ yi t'isa suldi geṅ me.

<sup>25</sup> Zemba ki nuṅ, kun tondo Raa kay kono kaye me. <sup>26</sup> A zemba pay kun an t'iso toose kaṅ bey sire sire aa zemba. <sup>27</sup> Wo aṅkeṅ kun ollo, n'un di rooto ti suma Galmeega, mattup ette kun an ti-garoy a zemba pay. <sup>28</sup> Geṅ beeko ki Galmeegiṅ Isa Almasi ti koona egguṅ.

**Mattup ki Taasuwa ere Aware  
Mukulu: Mattup ki Taasuwa ere Aware (New  
Testament)**

copyright © 2019 Wycliffe Bible Translators, Inc.

Language: (Mukulu)

Contributor: Wycliffe Bible Translators, Inc.

All rights reserved.

2020-11-19

---

PDF generated using Haiola and XeLaTeX on 21 Feb 2024 from source  
files dated 29 Jan 2022

523c1c0a-f8ac-5d2f-aebe-7063b0de6b23